

# **La Evangelio segun Markus**

segun la prima texto tradukita aden la Germana da  
Franz Eugen Schlachter

Versiono dil yaro 2000  
Nova revizita edituro

Haenssler editerio

(tradukita aden Ido da Juergen Viol, Germania)

## **La Evangelio segun Markus**

*La Markus-Evangelio esas skribita da Ioanes Markus, qua esis kunlaboristo da Paulus e Petrus, cirkum 63-68 p.K. Ol raportas precipue pri la servo da Iesu Kristo, qua venis sur la tero kom perfekta servisto di Deo „por servar e donar sua vivo kom ransono por multi“ (Markus 10, 45).*

### **(1) La anonco da Ionaes la Baptisto (1-8)**

Komenco dal Evangelio pri Iesu Kristo, la Filiulo di Deo. Quale esas skribita dal profeti: *Videz, me sendas mea mesajero koram tua vizajo, qua preparos tua voyo por tu. Voco vokas en la dezerto: Preparez la voyo por la Siniuro, planigez lua voyeti!* Tale komencis Ioanes en la dezerto, baptis ed anuncis bapto di penitenco por la pardono dal peki. Ed a lu venis la tota lando Judea e la habitanti di Ierusalem, ed il baptis omni en la Iordan, qui konfesis lia peki. Ioanes ma esis vestizita per kamelhari e portis ledra zono cirkum lua lumbi, ed il manjis lokusti e sovaja mielo.

Ed il anuncis e parolis: Venos unu pos me, qua esas plu forta kam me, e me ne esos digna por desligar lua shuo-kordoni. Me baptis vi per aquo, ma il bapto vi per la Santa Spirito.

### **Bapto e tento da Iesu Kristo (9-13)**

Ed eventis en ita jorni, ke Iesu di Nazaret venis a Galilea, ube Ioanes baptis lu en Iordan. E kande il venis ek la aquo, il vidis ke la cielo esis lacerita, e la Spirito decensis sur lu quale kolombo. E voco resonis ek la cielo: Tu esas mea amata Filiulo, qua joyigas me. E quik la Spirito duktis lu aden la dezerto. Ed il esis ibe quaradek jorni en la dezerto, e la Satan tentis lu. Ed il esis che la sovaja animala, e la anjeli servis a lu.

### **La unesma agi da Iesu en Galilea (14-15)**

Pos la aresteso da Ioanes, Iesu venis a Galilea ed anuncis la Evangelio dil rejio di Deo e parolis: La tempo pleneskis, e la rejio di Deo esas proxim. Penitencez e kredez pri la Evangelio!

### **La nomino dal unesma dicipuli (16-20)**

Kande il ma iris alonge la lago di Galilea, il vidis Simon ed Andreas, la fratulo di Simon. Li jetis reti aden la lago, pro ke li esis peskisti. Ed Iesu parolis a li: Sequez a me, e me facos ek vi homi-peskisti! E li livis lia laboro e sequis a lu. E kande Ieus iris kelke plusa, il vidis Iakobus, la filiulo di Zebedeus e lua fratulo Ioanes, qui sidis en batelo e reparis reti. E quik il vokis li, e li departis lia patro Zebedeus e la jorno-laboristi en la batelo e sequis ad Iesu.

### **Iesu forpulsas en Kapernaum nepura spirito (21-28)**

E li iris a Kapernaum, ed Iesu instruktis dum la sabato en la sinagogo. E la homi astonesis pri ilua instrukto, pro ke il instruktis kam kompetentulo, e ne kam la skribisti.

Ed en la sinagogo trovesis homo kun nepura spirito, qua kriis e parolis: Forirez! Quon tu volas da ni, Iesu di Nazaret? Ka tu venis por nocar ni? Me savas, ke tu esas la Santulo di Deo! Ma Iesu minacis lu e parolis: Tacez e departez lu. E la nepura spirito tiris lu ad e kontre, kriis laute e livis la korpo.

E li astonesis e questionis unu la altru e parolis: Quo esas to? Ka to esas nova doktrino? Il regnas anke pri la nepura spiriti per kompetento, ed ili obedias a lua vorto! E la rumoro pri Iesu difuzis en la tota regiono di Galilea.

### **Iesu risanigas la bomatro di Petrus ed altra maladi (29-39)**

E quik li departis la sinagogo ed iris kun Iakobus ed Ioanes al domo di Simon ed Andreas.. La bomatro di Simon ma jacis en febro, e ili raportis pri el ad Iesu. Ed il iris ad el, sizis elua manuo e tiris el a su, e la febro desaparitis senfriste, ed el servis ili.

Kande ma venis la vespero e la suno subiris, la homi transportis omna maladi e demoniziti. E la tota urbo esis koram la pordo. Ed il risanigis multi e diversa morbi e forpulsis multa demoni ed imperis a li tacar, pro ke li konocis lu.

E dum la sequanta matino, esis ankore tenebra, il levis su ed iris a solitara loko e pregis ibe. E Simon ed altri serchis lu. Pos ke li trovabis lu, li parolis: Omni serchas tu! Ed Iesu dicitis: Ni volas irar al proxima loki, tale ke me povas predikar anke ibe. Pro ke to esas mea tasko. Ed il instruktis en lia sinagogi omnaloke en Galilea e forpulsis demoni.

### **La risanigo dal lepriko (40-45)**

E venis lepriko a lu, falis koram la pedi di Iesu e parolis: Se tu volas, tu povas purigar me. Ed Iesu kompatis pri lu, tushis lu per la manuo e parolis: Me volas. Esez purigata! E dum Iesu parolis, la lepro desaparitis senfriste, ed la viro esis pura.

Ed il exhortis lu serioze, parolis e forsendis lu: Audez, ne parolez kun nulu pri ica afero. Irez e montrez tu koram la sacerdote e sakrifikez pro tua risanigo, segun la impero da Mose, tale ke li havas atesto! Il ma iris ed anuncis omnaloke la evento, tale ke Iesu ne povis vizitar publike urbo, ma nur solitara loko. E la homi venis ek omna direcioni ad Iesu.

## **(2) La risanigo dal paralizito (1-12)**

E pos kelka dii il iris itere a Kapernaum. E kande on audis, ke il esus en la domo, multi venis e balde ja esis nula plaso, anke ne avan la pordo, ed il anuncis al homi la vorto. E kelki venis a lu e transportis paralizito per quar viri. E pro ke li ne trovis pas-laso pro la multa homi, li facis aperto en la tekto e lasis la lito, sur qua la paralizito jacis, tra la aperto. Kande ma Iesu vidis lia kredo, il parolis al paralizito: Filiulo, tua peki pardonesas!

Sidis ma kelka skribisti, qui pensis en lia kordii: Quala blasfemero! Qua homo povas pardonar peki, se ne unike Deo? Ed Iesu agnoskis lia pensi e parolis a li: Quo esas plu facila, se me dicas al paralizito: Tua peki pardonesas, o se me dicas: Levez tu, prenez tua lito ed irez? Savez, ke la Filiulo dil homo posedas plenipotenco pardonar peki sur la tero – ed Iesu dicis al paralizito: Me dicas a tu, levez tu, prenez tua lito ed irez heme! E la malado levis su senfriste, prenis sua lito ed iris koram omna okuli extere. Ed omni astonesis, laudis Deo e parolis: Tala miraklon ni vidis nultempe.

## **La nomino da Levi (13-17)**

Ed itere Iesu iris al lago, e la tota turbo venis a lu, ed il instruktis li. E kande il preteriris, il vidis Levi, la filiulo di Alfeus, sidante koram la doganeyo. Ed il parolis a lu: Sequez a me! E Levi levis su e sequis ad Iesu.

Ed eventis, kande Iesu sidis che tablo en la domo di Levi, ke anke multa doganisti e pekeri aparis che Iesu e sua dicipuli, pro ke esis multa homi, qui volis vidar lu. E kande la skribisti e farizei vidis, ke il manjis kun doganisti e pekeri, li dicis ad ilua dicipuli: Pro quo il manjas e drinkas kun doganisti e pekeri? Kande Iesu audis lia vorti, il dicis a li: Ne la sanuli bezonas kuracisto, ma la maladi. Me ne venis por vokar yustuli, ma la pekeri pro la penitenco.

### **Parabolo pri la fasto. Paraboli pri la nova peco e pri la nova vino (18-22)**

E la dicipuli di Ioanes e la farizezi praktikis fasto. Ed li venis ad Iesu e questionis: Pro quo fastas la dicipuli di Ioanes e la farizezi, ma ne tua dicipuli? Ed Iesu respondis: Ka la gastis dum la mariajo-festo povas fastar, se la fiancitulo esas inter li? Tale longe la fiancitulo esas inter li, li ne povas fastar. Ma venos dii sen la fiancitulo, e lore, en ica dii, li fastos.

Nulu sutas peco di nova tuko sur olda vesto, altrakaze desligos la nova peco de la olda, e la fendo divenas plu mala. E nulu plenigas nova vino aden olda fel-saki, altrakaze lacerus la nova vino la olda fel-saki. La vino esus perdita, e la fel-saki disfalus. Pro to on plenigez nova vino aden nova fal-saki.

### **Iesu esas la Sinioro pri la sabato (23-28)**

Ed eventis, ke Iesu iris dum la sabato tra la frument-agri. E lua dicipuli kolektis survoye la spiki. Nun dicis la farizezi a lu: Videz, pro quo li ruptas dum la sabato la lego?

Ed il parolis a li: Ka vi nultempe lektis, quon David facis, kande il e sua kamaradi sufris hungro? Ka ne David iris aden la domo dil chefsacerdoto Abjathar e manjis la santa pani, quin darfis manjar nur la sacerdoti? Ka ne David disdonis la nutrivo inter sua kunuli? Ed Iesu dicis a li: La sabato esis kreita pro la homo, ne la homo pro la sabato. Do esas la Filiulo dil homo anke Sinioro pri la sabato.

### **(3) La viro kun la sikigita manuo. Plusa risanigi. (1-12)**

Ed Iesu iris itere al sinagogo. Ibe esis viro kun sikigita manuo. E li guatis a lu, kad il risanigos dum la sabato, tale ke li povus plendar kontre lu.

Ed il parolis al homo kun la sikigita manuo: Levez tu e venez al mezo! Ed Iesu dicis a li: Kad on povas facar dum la sabato bona o mala agi, la vivo salvar o mortigar? Li ma tacis. Ed Iesu regardis li kun iraco ed estis trista pro lia harda kordii, ed il dicis al malado: Montrez tua manuo! E la malado montris sua manuo, e la manuo divenis pura kam la altra.

Nun la farizei iris ek la sinagogo e senfriste konsultis kun la partisans di Herodes, quale li povus mortigar lu.

Ma Iesu e sua dicipuli retretis al lago. E granda turbo ek Galilea, Judea, Ierusalem, Idumea, ek la regiono dil Iordan e Tirus e Sidon venis a lu, pro ke li audabis, ke il facis multa kozi.

Ed Iesu imperis a sua dicipuli prontigar poka navo pro la populo, tale ke la homi ne opresus lu. Pro ke Iesu risanigis multa homi, omni, qui sufris sub plago, volis tushar lu. E kande la nepura spiriti vidis lu, li falis koram lua pedi e kriis: Tu esas la Filiulo di Deo! Ma il interdiktis al demoni ica revelo.

### **La nomino dal dek-e-du apostoli (13-19)**

Ed Iesu iris sur la monto e vokis a su, quin il volis, e li venis ad Iesu. Ed il determinis dek-e-du por deputar li anunciar la Evangelio, kun la plenipotenco, ke li risanigas maladi e forpulsas demoni: Simon, qua recevis da Iesu la apudnomo Petrus, Iakobus, la filiulo di Zebedeus, Ioanes, la filiulo di Iakobus, qua recevis da Iesu la apudnomo Boanerges (filiuli dil tondro), Andreas, Filipus, Bartolomeus, Matheus. Thomas, Iakobus, la filiulo di Alfeus, Tadeus, Simon ek Kanan ed Iudas Iskariot, qua trahizis lu plu tarde.

### **La povo da Iesu pri la demoni. La blasfemo kontre la Santa Spirito (20-30)**

E li eniris la domo, ed itere venis granda turbo, tale ke li mem ne povis manjar.

E kande iti, qui esis cirkum Iesu audis la prediko, li volis sizar lu e dicis: Il esas fola! E la skribisti, qui venabis ek Ierusalem, dicis: Il havas Belzebul! E: Per la estro dil demoni il forpulsas la demoni.

Iesu vokis li a su e parolis a li en paraboli: Quale povas Satan forplusar Satan? Se imperio esas en su ne-unionita, ol ne povas existar. E se domo en su esas ne-unionita, ol ne povas existar. E se la Satan kombatas kontre su ipsa, il ne povas existar, ma trovos fino. Nulu povas enirar la domo di fortulo por raptar la posedajo, nur se il katenus la fortulo. Unesme lore il povas raptar la posedajo.

Vere, me dicas a vi: La homi trovez pardono de omna peki, anke la blasfemo. Ma qua blasfemas kontre la Santa Spirito ne trovos pardono en eternes, ma il trovos la eterna tribunalo. Pro ke li dicis: Il havas nepura spirito.

### **La vera parenti di Iesu (31-35)**

Nun venis ilua fratuli e matro, ma li restis extere e sendis irgu por vokar lu. E la turbo sidis cirkum Iesu. Li parolis a lu: Videz, tua matro e fratuli esas extere e serchas tu! Ed il respondis e parolis: Qua esas mea matro e qua esas mea fratuli? Qua plenigas la Deala volo, itu esas mea fratulo, fratino e matro.

### **(4) La misterio pri la rejolando di Deo (1-2)**

Ed itere il komencis instruktar che la lago. E granda turbo esis che lu, tale ke il iris en la navo e sideskis. E la populo esis che la lago sur la lando. Ed il instruktis a li multa aferi e parolis en paraboli segun sua vorti.

### **La parabolo pri la semanto (3-9)**

Audez! Videz, la semanto iris por semar. Ed eventis, kande il semis, ke kelka grani falis sur la voyo, e la uceli venis ek la cielo e manjis la semino. Altra semino ma falis sur stonoza sulo, e la semino aparis senfriste, pro ke profunda tero mankis. Kande ma la suno venis, forbrulis la semino, pro ke ol ne havis radiko. Ed altra semino falis inter la dorni, ma la dorni kreskis e sufokis la semino, e la semino restis sen frukto. Ed altra semino falis en bona tero e montris frukto, qua kreskis, triadekopla, sisadekopla ed centopla. Ed Iesu dicitis: Qua havas oreli, il audez!

### **La motivo por la paraboli (10-12)**

Kande Iesu esis sola, iti, qui esis cirkum lu e la dek-e-du dicipuli, questionis pri la parabolo. Ed il parolis a li: Vi esas kapabla komprenar la misterii pri la rejolando di Deo, ma iti, qui esas extere recevos omno en paraboli, tale ke li per vidanta okuli vidar, ma tamen ne perceptos, tale ke li per audanta oreli audar, ma tamen ne komprenos, pro ke li ne trovez pardono pro lia peki.

### **La interpretado pri la semanto (13-20)**

Ed il dicitis a li: Se vi ne komprenas ica parabolo, quale vi volas komprenar la altra paraboli? La semanto semas la vorto. La semini sur la voyo esas iti, qui audis la vorto, ma lore aparas la Satan e furtas la vorto ek lia kordii. La semini sur la stonoza sulo esas iti, qui audis la Deala vorto joyoze, ma li ne havas radiko, li esas nekonstanta. Plu tarde, se eventas danjera situeso pro la vorto e persekuto, li montras rezisto. E la semini inter la dorni esas iti, qui audis la vorto, ma pro mondala sorgi ed iluzioni pri la richeso e deziri a materiala aferi, la vorto sufokos.

E la semino, qua falis en la bona tero, esas iti, qui audis la vorto e montris frukto, unu triadekopla, la altru sisadekopla ed itu centopla.

### **La lumo sur la kandeliero (21-25)**

Ed Iesu parolis a li: Kad existas la lumo pro to, ke on pozas ol sub la bushelo o la lito? Ka ne existas la lumo por la kandeliero? Pro ke existas nulo, olquan on revelos, e nulo eventas sekrete, quo venos al jorno. Qua havas oreli, il audez!

Ed Iesu parolis a li: Atencez to, quon vi audas! Per qua mezurilo vi mezuros, tale on mezuros vi e mem ankore plu multe. Qua ja havas, obtenos anke plu multe. Qua ma havas nulo, il perdos anke to, quon il ja posedis.

### **La parabolo pri la kreskado dil semo (26-29)**

Ed Iesu dicis: Kun la rejio di Deo esas tale, quale se homo jetas semino sur la tero. Lore il dormas e levas su, dio e nokto, e la semino kreskas, sen ke la homo lo savas. Pro ke la tero portas ipsa la frukto. Unesme venas la stipo. Lore la spiko, lore la plena frumento en la spiko. Se ma la frukto aparas, il senfriste sendos la siklo, pro ke esas rekolto-tempo.

### **La parabolo pri la sinapo (30-34)**

Ed Iesu parolis: Per quo ni povas komparar la rejio di Deo o quala parabolon ni devas elektar? Esas quale la grano di sinapo, qua esas la maxim mikra inter omna semini en la mondo. E pos ke ol esis en la tero, ol kreskos, plu granda kam omna altra planti en gardeno, kun granda brancheti, tale ke la uceli dil cielo povas repozar sub olua ombro.

Ed en multa altra paraboli il dicis a li la vorto, segun lia kompreno. Il parolis a li nur per paraboli, ma se ili esis sola, il interpretis omno por sua dicipuli.

### **Iesu kalmigas la tempesto (35-41)**

E dum ica dio, vespere, il parolis a li: Ni volas vehar al altra rivo! La dicipuli forsendis la turbo ed eniris la batelo, en qua Iesu sidis, e departis. Ed altra poka naveti vehis kun. E levis su granda tempesto, e la ondi batis aden la batelo, qua pleneskis per aquo. Ed il esis dope sur la batelo e dormis sur kuseno. E li vekigis lu e parolis: Maestro, ka tu ne sorgas, se ni mortos?

Ed il erektis su e parolis al vento e la lago: Tacez, donez kalmeso! La vento tacin ed eventis granda silenco. Ed il parolis a li: Pro quo vi esas tale timema? Ka vi ne havas kredo? E super li venis granda timo e li interparolis: Qua il esas, ke vento e lago devas obediar?

### **(5) La risanigo dal demonizito (1-20)**

E li venis al altra rivo dil lago al regiono dil Gadarani. E pos ke Iesu venabis ek la batelo, homo kun nepura spirito hastis a lu, qua lojis en la tombi. Nulu povis katenar lu, anke ne per fero, quankam on katenis lu ofte, ma il destruktis la kateni e nulu povis domtar lu. Ed il vivis dum la tota tempo sur la monti, dio e nokto, ed en la tombi, ed il kriis e batis su ipsa per stoni.

Kande il ma vidis Iesu ek la foreso, il hastis a lu e falis koram lua pedi e kriis: Iesu, tu Filiulo di Deo, qua esas la Suprega, quala aferon me havas kun tu? Che Deo, ne tormentez me! Pro ke Iesu imperabis al demono departar la korpo. Nun questionis Iesu: Quale esas tua nomo? E la demono respondis: Legiono, pro ke ni esas multa.

E la demono pregis tre, ke il ne forsendus li ek la lando. Esis ma ibe che la monti granda trupo de porki, qua pasturis. E la demoni pregis omna e parolis: Sendu ni aden la porki! E senfriste Iesu aprobis. E la demoni iris aden la porki. E la tota trupo precipitis su aden la lago. Esis ma duamil porki, ed omni dronis en la lago. La pastori ma fugis e raportis pri ica evento en la urbo e sur la lando. E la homi venis ad Iesu por vidar quo esabis. E li vidis la demonizito, qua havabis la legiono, en vesti, tote normala, e li sentis timo. E la testi naracis pri la evento kun la demonizito e la porki. Nun li pregis Iesu departar la regiono.

Kande Iesu eniris la batelo, la risanigito pregis Iesu, ke il povus restar che lu. Ma Iesu refuzis e dicis: Irez a tua domo, a tua familio ed anuncez, quon la Sinioro facis, qua gracon il grantis a tu! E il departis Iesu e komencis en la regiono dil Dek Urbi anuncar, quala miraklon Iesu facabis. Ed omni astonesis.

### **La risanigo dal muliero kun la sango-fluo. La rezurekto dal filiino di Jairus (21-43)**

Iesu retrovehis itere al altra rivo. E granda turbo esis cirkum lu. Ed il restis an la lago. E videz, la estro dil sinagogo kun la nomo Jairus venis e falis koram la pedi di Iesu e suplikis: Mea poka filiino stacas koram la morto, venez, e metez tua manui sur el, tale ke el restas vivar! Ed Iesu iris kun lu. E granda turbo iris kun lu ed opresis lu.

Ed esis certena muliero, qua sufris sub la sango-fluo depos deke-du yari. El esabis che diversa kuracisti e perdis elua tota posedajo, ma omno esabis vane, kontree, la maladeso divenis plu mala. Pos ke el audabis pri Iesu, el iris inter la multa homi e proximeskis ad Iesu dedope. Tandem el tushis lua robo. Pro ke el kredis: se me tushas lua robo, me trovos risanigo! E senfriste el remarkis, ke el esis libera de la plago, e la fonto da la sango-perdo desaparitis.

Iesu ma, qua perceptis en su ipsa, ke forteso livis lu, turnis su senfriste en la mezo dil turbo e parolis: Qua tushis mea robo? E lua dicipuli dicis a lu: Tu vidas, quale la homi opresas tu e questionas, qua tushis me? Ed Iesu turnis su al persono, qua tushabis lu. Nun venis la muliero en timo, tremante ad Iesu, pro ke el perceptis la miraklo, e falis koram la pedi di Iesu e konfesis la tota vereso. Il ma dicis ad el: Filiino, tua kredo salvis tu! Irez en paco, liberigita de tua plago!

Dum Iesu ankore parolis, aparis kelka servisti di Jairus e dicis: Tua filiino mortis. Pro quo tu penigas la maestro ankore? Kande Iesu ma audis ica vorti, il dicis al estro dil sinagogo: Ne timez, nur kredez! E nur Petrus, Iakobus ed Ioanes, la fratulo di Iakobus akompanis lu.

Ed kande Iesu venis al domo di Jairus, il vidis la turbo, quale li ploris e lamentis. Ed Iesu eniris la domo e parolis: Pro quo vi bruisas e ploras? La infanto ne mortis, ma dormas! E li ridis pri lu. Iesu forsendis li ek la domo. Lore il kunprenis la gepatri dil infanto e sua dicipuli ed eniris la chambro, ube la infanto jacis.

Ed il sizis la manuo dil infanto e dicis: Talita kumi, to esas: Puerino, levez tu! E senfriste la puerino levis su ed iris en la chambro cirkume. El evis dek-e-du yari. E la homi esis exter su pro joyo. Ed Iesu imperis, ke nulu audez pri ica evento e ke la puerino obtenez nutrivo,

## **(6) La nekredo dal habitanti di Nazaret (1-6)**

Ed Iesu departis la loko e venis a sua patro-urbo kun sua dicipuli. E kande venis la sabato, il komencis instruktar en la sinagogo. E la audantaro astonis e parolis: De ube il havas ica savo? E quala povo il posedas, ke il povas exekutar tala mirakli per lua manui? Kad il ne esas la karpentisto, la filiulo di Maria, la fratulo di Iakobus e Joses e Iudas e Simon?

E ka ne lua fratini esas hike che ni? E li skandalesis pri Iesu. Iesu ma parolis a li: Singlu aceptas profeto, nur ne la propra patro-urbo e la parenti e la familio! Ed il ne povis exekutar ibe mirakli, e tale il risanigis nur kelka maladi per sua manui. Ed Iesu astonesis pri lia nekredo. Ed il tramigris la vilaji en la regiono ed instruktis.

### **La sendo dal dek-e-du apostoli (7-13)**

Ed Iesu vokis sua dicipuli a su en komencis sendar li en grupi ek du personi aden la lando. Ed il donis a li plenipotenco pri la nepura spiriti. Ed il imperis, ke li nur prenas bastono survoye, nula sako, nula pano, nula pekunio, ne du kamizi, nur sandali por la pedi. Ed il parolis a li: Ube anke sempre vi eniras domo, ibe restez, til vi foriros. Ed iti, qui ne volas audar via vorti e ne aceptos vi, departez li e sukusez la polvo de via pedi, tale ke li havos atesto per vi. Vere, me dicas a vi: Sodom e Gomora havos ankore jeneroza trakto dum la dio dil tribunalo kam ica urbo! E li iris ed anuncis la exekuto da penitenco. E li forpulsis multa demoni ed uncionis multa maladi per oleo e risanigis li.

### **La senkapigo da Ioanes la Baptisto (14-29)**

E rejoy Herodes audis pri Iesu, ed il parolis: Ioanes la Baptisto rezurektis de la mortinti. Pro to il podesas povo exekutar mirakli! Altri dicis, il esus Elia, ed itere altri dicis, il esus profeto o tale quale profeto. Kande Herodes audis to, il dicis: Il esas Ioanes, quan me senkapigis. Il rezurektis de la mortinti!

Esis nam tale: Herodes lasis arestar Ioanes pro Herodias, la spozino dil lua fratulo Filipus, pro ke el esis nun la spozino di Herodes. Pro ke Ioanes dicabis a Herodes: Esas interdiktita por tu, ke tu havas la spozino di tua fratulo!

Herodias ma volis mortigar Ioanes, ma Herodes timis Ioanes, pro ke il savis, ke Ioanes esis justa e santa viro, ed il gardis lu ed obediis lu en multa aferi ed audis lua vorti volunte.

Lore eventis granda festo pro la nasko-dio di Herodes, ed omna estri ed eminenti ek Galilea esis ibe. E la filiino di Herodias venis e dansis.

E pro ke Herodes e la altri che tablo trovis plezo pri el, Herodes dicis al puerino: Tu povas havar deziro de me, quo anke sempre lo ezez! E Herodes juris: Me donos a tu la duimo de mea rejolando! El ma iris extere e parolis kun sua matro: Quon me povas postular? Herodias ma dicis: La kapo di Ioanes la Baptisto! E senfriste el iris a Herodes e dicis: Donez a me senfriste sur pladego la kapo di Ioanes la Baptisto!

Herodes divenis tre trista, ma pro la juro e la altra gastis, il ne volis refuzar la postulo. E Herodes sendis gardisto aden la karcero ed imperis adportar la kapo dil Baptisto. La gardisto senkapigis Ioanes en karcero, adportis la kapo sur pladego e donis ol al puerino, e la puerino transdonis la kapo a sua matro. E kande ilua dicipuli audis pri to, li venis, prenis la kadavro e pozis ol aden tombo.

#### **La nutrivo por la kinamil (30-44)**

E la apostoli kunvenis che Iesu e raportis pri lia agi e quon li instruktabis. Ed Iesu dicis: Venez a kalma loko e repozez! Pro ke la turbo, qua venis ed iris esis granda, e li ne havis mem tempo por manjar. E li vehis kun la batelo a solitara loko. E la homi vidis li, e multi perceptis Iesu. E ili venis ek omna urbi ensemble ed atingis la loko ante ke la dicipuli aparis. E kande Iesu ekiris, il vidis granda turbo, ed il sentis kompato, pro ke ili esis quale mutoni sen pastoro. Ed Iesu komencis instruktar a li pri multa aferi.

E kande nun la dio fineskis, la dicipuli venis ad Iesu e dicis: Ica loko esas solitara e la vespero venos. Forsendez la homi, tale ke li povas komprar en la vilaji pano, pro ke mankas nutrivo. Iesu ma respondis: Donez nutrivo a li! E la dicipuli dicis: Ka ni devas irar e komprar po ducent denari pano? Iesu ma parolis: Quanta panin vi havas? Irez ed explorez! E li venis ad Iesu e dicis: Kin pani e du fishi.

Ed Iesu imperis, ke omna homi sideskez en grupi en la verda pasturo. E la grupi konsistis ek cent homi e kinadek homi. Ed Iesu prenis la kin pani e du fishi, vidis al cielo, dankis, ruptis la pani e donis oli al dicipuli, qui disdonis oli en la turbo. Anke la du fishi disdonis il inter la turbo. E ili manjis omna e divenis saturita. E li plenigis dek-e-du korbi kun restaji, anke da la fishi. Ed iti, qui manjis la pano esis kinamil viri.

### **Iesu iras sur la lago. Risanigi en Genezaret (45-56)**

Ed Iesu urjis sua dicipuli enirar la batelo por vehar al altra rivo, a Bethsaida, til il forsendus la homi. E pos ke Iesu adiabis sua dicipuli, il iris a monto por pregar.

E kande esis vespero, la batelo esis sur la lago, ed Iesu sur la lando. Ed Iesu vidis, ke li povis remar nur sub peni, pro ke la vento stacis kontre li. Fru-matine Iesu venis a li, irante sur la lago. Ma kande li vidis Iesu, li kredis il esus fantomo, e li kriis omna pro timo. E senfriste Iesu parolis a li: Ne timez, me esas! Ed il eniris la batelo e la vento kalmeskis. Ed omna dicipuli astonis super omna limiti. Li ne povis kredar, quankam la miraklo pri la pani eventabis, pro ke lia kordii esis hardigita.

Tandem li atingis la lando. E kande li departis la batelo, la homi perceptis Iesu senfriste, iris aden la tota regiono e komencis transportar la maladi en liti ad Iesu. Ed en vilaji ed urbi, ili pozis la maladi sur libera placi, ed omni, qui tushis la robo di Iesu divenis sana.

## **(7) La farizei e la tradiciono dil ancestri (1-13)**

Ed eventis kunveno da farizei e skribisti ek Ierusalem che Iesu. E li vidis, ke kelka dicipuli manjis la pano per nelavita manui, e li kritikis ica konduto. Pro ke farizei ed entute omna Judi manjas nur per lavita manui, segun la tradiciono dil ancestri. E se li esis che la bazaro, li manjas nur kun lavita manui. E li devas exekutar anke lavadi da pokali e krugi, vazaro e polsteri. Nun la farizei e skribisti questionis Iesu: Pro quo tua dicipuli manjas la pano per nelavita manui, kontre la tradiciono dil ancestri? Iesu ma respondis: En tre konvenanta maniero, Iesaia dicitis pri vi hipokrituli: *Ica populo honorizas me per labii, ma lia kordii esas for de me. Lia honorizo por me esas vane, pro ke li prizentas doktrini, qui esas homala legi.*

Vi abandonas la Deala legi e plenigas la homala tradicioni, quale lavadi da krugi e pokali ed altra agi.

Ed Iesu parolis a li: Vi desaprobos la Deala legi pro via tradicioni. Moses dicitis: *Tu honorizez patro e matro!* E: *Qua pekas kontre patro e matro meritas la morto!*

Vi ma instruktas: Se persono dicas a sua gepatri: Quon me propre devus donar a vi esas determinita por Deo – lore il ne devas helpar a sua gepatri. Yes, vi interdiktas lo. Tale vi nuligas la Deala impero per via propra tradiciono. Ed existas ankore altra exempli.

## **La homala kordio: Fonto dil desnetigo (14-23)**

Ed Iesu vokis la tota populo a su e dicitis: Audez e komprenoz! Nula extera kozi povas desnetigar la homo, ma la interna qualesi desnetigas la homo. Qua havas oreli, il audez!

E kande Iesu esis heme, lua dicipuli questionis pri la parabolo. E il parolis a li: Kad anke vi ne povas komprenar to?

Ka vi ne savas, ke lo extera ne povas desnetigar la homo? La nutrivo ne iras al kordio, ma aden la ventro e departas la korpo en naturala maniero.

Ed Iesu dicitis: Lo interna desnetigas la homo. Pro ke ek la kordio dil homo venas la maligna pensi: Adultero, nechasteso, ocido, furto, avideso, maligneso, trompo, senbrideso, envidio, blasfemo, arogemo e desraciono. Ica maligna pensi venas ek la interna homo e desnetigar lu.

### **Iesu e la nejudala muliero (24-30)**

Ed Iesu iris al regiono di Tirus e Sidon ed eniris domo, ma il ne volis, ke irgu savis pri to, e tamen la afero ne restis celita. Pro ke muliero audis pri Iesu, ed el havis filiino kun nepura spirito. Ed el venis ad Iesu e falis koram lua pedi. La muliero esis Grekino e venis ek ica regiono, ed el pregis Iesu forpulsar la demono ek sua filiino. Ma Iesu parolis al muliero: Unesme la infanti devas esar saturita! Pro ke esus neyusta, se on forprenas la pano de la infanti e donus ol al hundi! El ma respondis: Yes, Siniro, e tamen la hundi sub la tablo manjas la krumi dal infanti! Ed Iesu dicitis al muliero: Pro ica vorto, irez. La demono livis tua filiino! E kande el venis a sua domo, el vidis, ke la demono esis for e la filiino jacis sur la lito.

### **La risanigo dal surda-mutulo (31-37)**

Ed Iesu departis la regiono di Tirus e Sidon ed iris al lago di Galilea, tra la regiono dil Dek Urbi. E li venigis ad Iesu surdulo, qua preske ne povis parolar e pregis, ke il pozez la manuo sur lu. Ed Iesu prenis la malado latere, for de la turbo, pozis lua fingri aden ilua oreli e tushis la lango per salivo. Iesu vidis al cielo, sospiris e dicitis: Effata, to esas: Apertez tu!

E senfriste la oreli e la lango divenis libera, e la malado parolis korekta. Ed il imperis, ke nulu savez pri ica evento, ma la homi propagis lo tante plu. E li astonis pri omna mezuri e dicis: Il facis omno bone! La surduli povas audar e la mutuli povas parolar!

### **(8) La nutrivo dal quaramil (1-9)**

Kande en ica tempo kunvenis granda turbo, qua ne posedis provizuro, Iesu vokis sua dicipuli a su e parolis: Me sentas kompatato kun ica homi, pro ke li esas ja tri jorni che me e manjis nulo. E se me forsendos li sen nutrivo, lore li hungros survoye, pro ke multi venis ek granda foreso.

E lua dicipuli respondis: De ube povas venar persono ad ica dezerto por satigar ica homi per pano? Ed Iesu questionis: Quanta panin vi havas? E li dicis: Sep.

Ed Iesu imperis al homi sidar sur la tero. E il prenis la sep pani, dankis, ruptis oli e transdonis oli a sua dicipuli por disdonar la pani. E li disdonis oli inter la turbo. Esis ankore kelka poka fishi. E pos ke Iesu dankabis, il imperis disdonar anke la fishi. La turbo ma manjis ed esis satigita. E restis ankore sep korbi kun restaji e krumi. Esis ma cirkume quaramil homi, qui manjabis. Ed il forsendis li.

### **La farizei postulas signo ek la cielo (10-13)**

E senfriste il eniris kun sua dicipuli la batelo e venis al regiono di Dalmanutha. E la farizei venis e komencis disputar kun Iesu. E li postulis de Iesu signo ek la cielo por tentar lu. Ed Iesu sospiris en mento e parolis: Pro quo volas ica generaciono signo? Vere, me dicas a vi: Ica generaciono ne recevos signo! Ed il lasis stacar li, eniris la batelo e vehis al altra rivo.

### **Averto pri la fermento-pasto dal farizezi (14-21)**

E li esis sen nutrivo e posedis nur un pano en batelo. Ed Iesu parolis avertante: Atencez! Prezervez vi pri la fermento-pasto dal farizezi e Herodes! E li interparolis: Il opinionas pro ke ni obliivis la pano!

E kande Iesu remarkis lia vorti, il parolis: Pro quo vi sorgas pri la pano? Ka vi ankore sempre ne komprenas? Ka via kordio esas sempre ankore tale harda? Vi havas okuli, ma vidas nulo, vi havas oreli, ma audas nulo. Ka vi ne memoras pri la pani por la kinamil homi, e pri la korbi kun la krumi? Li dicitis: Esis dek-e-du korbi. Ed Iesu dicitis: E dum la nutrivo dal quaramil homi, quanta korbi vi konservis? Li dicitis: Sep. Ed Iesu questionis: Pro quo vi do esas ankore tale nesavanta?

### **Iesu risanigas blindulo (22-26)**

Ed Iesu venis a Bethsaida. Ed on venigis blindulo a lu, ke il tushez lu. Ed il prenis la mano dil blindulo e duktis lu avan la vilajo. Il sputis aden ilua okuli, pozis la manui sur la blindulo e questionis, kad il vidus ulo. E la blindulo vidis alte e dicitis: Me vidas homi ed iranta arbori! Iesu pozis nun sua manui sur ilua okuli e nun la blindulo trovis risanigo e povis vidar omno klare. Ed Iesu imperis al blindulo: Ne irez a Bethsaida e dicez nulo pri la evento!

### **La konfeso da Petrus (27-30)**

Ed Iesu iris kun sua dicipuli al vilaji che Cezarea Filipi, e survoye il questionis sua dicipuli: Quon dicas la homi, qua me esus? Li respondis: Ioanes la Baptisto, Elias od irga profeto.

Ed il parolis a li: E vi, quon vi kredas, qua me esas? Nun respondis Petrus e dicis ad Iesu: Tu esas Kristo! Ed Iesu imperis serioze, ke li parolez kun nulu pri lu.

### **La unesma anonco pri la sufri e rezurekto da Iesu (31-33)**

Ed Iesu komencis instruktar a li, ke la Filiulo dil homo sufros multe, e ke la estri, la chefsacerdoti e skribisti refuzos e mortigos lu, e ke il rezurektos pos tri jorni. Ed Iesu parolis rekte avane. Nun Petrus prenis Iesu latere e komencis kontredicar. Iesu ma turnis su, regardis sua dicipuli ed exhortis Petrus: Retroirez, Satan! Pro ke tu ne pensas en Dealala ma homala maniero!

### **Pri la sucedo (34-38)**

Ed Il vokis a su la tota turbo e sua dicipuli e parolis: Qua volas sequar a me, il renegez su ipsa, il portez sua kruco e sequez a me! Pro ke qua volas salvar sua anmo, perdos ol, qua ma perdos sua anmo pro me e la Evangelio, trovos salvo. Pro ke quo esus bona por la homo, se il ganus la tota mondo e perdus sua anmo? Pro ke qua shamas pri mea vorti inter ica generaciono de adulteranti e pekeri, la Filiulo dil homo sentos shamo anke pri lu, se il venos en la splendideso di sua Patro kun la santa anjeli.

### **(9) La transfiguro di Iesu (1-13)**

Ed Iesu parolis a li: Vere, me dicas a vi: Esas kelki inter vi, qui stacas hike e ne gustos la morto, til li vidis la rejio di Deo en omna forteso. E pos sis jorni Iesu duktis Petrus, Iakobus ed Ioanes sur alta monto. Ed Iesu recevis koram li transfiguro. E lua vesti radiis blanka kam nivo, quale nul-loke sur la tero. Ed aparis Elia e Mose, qui parolis kun Iesu.

E Petrus parolis ad Iesu: Rabino, esas bona, ke ni esas hike! Ni volas erektar tri kabani, por tu, Mose ed Elia. Nam Petrus ne savis, quon il devus dicar, pro ke li timis tre. Subite venis nubo ed ombrizis li, ed ek la nubo risonis voco e parolis: Itu esas mea amata Filiulo, audez a lu! E subite li vidis nulu, nur Iesu.

E kande li departis la monto, Iesu imperis, ke li ne parolez pri ica evento kun nulu til la Filiulo dil homo venus ek la mort-regiono. E li konservis la vorto ed interparolis, quala signifikio havus la rezurekto ek la mort-regiono.

E li questionis Iesu e parolis: Pro quo la skribisti dicas, ke unesme Elia devas venar? Iesu ma respondis: Advere Elia venos ed aranjos omno quale antee. Quale esas skribita pri la Filiulo dil homo? Nam ke il devas sufrar multe e trovos desestimo! Ma me dicas a vi, ke Elia ja venis, e li facis kun lu quon li volis, segun la skriburo.

### **La risanigo dal posedata puerulo (14-29)**

E kande Iesu venis al dicipuli, il vidis granda turbo e skribisti, qui disputis kun kelka homi. E la tota turbo venis senfriste en movado kande li vidis Iesu, e li hastis a lu e salutis lu. Ed Iesu questionis la skribisti: Pri quon vi disputas? E viro ek la turbo respondis e parolis: Maestro, me duktis mea filiulo a tu, qua havas maligna spirito. La demono lasas falar lu, grincas kun la denti, spumifas e rigideskas. Me dicis a tua dicipuli, ke li forpulsez la demono, ma li ne povis lo!

Iesu ma respondis: O tu nekreda generaciono! Quale longe me devas esar che vi? Quale longe me devas tolerar vi? Duktez lu a me! E li venigis la puerulo ad Iesu. E kande la demono vidis Iesu, la puerulo falis e spumifis. Ed Iesu questionis la patro: Quale longe il esas malada? La Patro dicis: Depos la infanteso. La demono jetis lu ofte aden la fairo od aquo por mortigar lu. Se tu povas, montrez graco e helpez a ni!

Iesu dicis al patro: Se tu kredas, omno esas posibla! E senfriste la patro vokis kun lakrimi en la okuli: Me kredas. Sinioro, facez, ke me esos vera kredanto! Kande nun Iesu vidis la turbo, qua hastis a lu, il minacis la demono e parolis: Tu surda e muta demono, me imperez a tu, departez la infanto e nultempe retrovenez! E la demono kriis e departis la korpo, e la puerulo esis sen movo, tale ke multi dicis: il mortis! Ma Iesu sizis lua manuo e tiris lu a su. E la puerulo levis su.

E kande li esis en domo, lua dicipuli questionis: Pro quo ni ne povis forpulsar la demono? Ed Iesu respondis: Ica speco departas la korpo nur per fasto e prego.

### **La duesma anonco pri la sufri e rezurekto da Iesu (30-32)**

E li livis la loko ed iris tra Galilea. Ed Iesu ne volis, ke irgu experiencias to. Ed il instruktis a sua dicipuli e parolis: La Filiulo dil homo falos en la manui dil homi, e li mortigos lu. E pos lua morto il rezurektos dum la triesma jorno. Ma li ne komprenis la vorto e timis questionar lu pri ica afero.

### **La maxim grandulo en Deala rejio (33-41)**

Ed Iesu venis a Kapernaum, e kande il esis heme, il questionis li: Pri quo vi parolis survoye? Li ma tacis, pro ke li diskutabis, qua esus la maxim grandulo. Ed Iesu sideskis, vokis la dek-e-du dicipuli a su e dicis: Se on volas esar la unesma, lore on devas esar la servisto de omni.

Ed il prenis infanto e pozis la infanto inter li. Pos ke il embracabis la infanto, il parolis a li: Qua acceptas tala infanto en mea nomo, acceptas me, e qua acceptas me, ne acceptas me, ma itu, qua deputis me.

Ioanes ma respondis e parolis: Maestro, ni vidis viro, qua ne esas che ni.

Il forpulsas en tua nomo demoni, e ni interdiktis a lu ica agi, pro ke il ne esas dicipulo de ni. Iesu ma parolis: Ne impede lu! Pro ke nulu, qua exekutas en mea nomo mirakli, povas difamar me. Pro ke qua ne esas kontre ni, il esas por ni. Qua donas a vi kupeto de aquo en mea nomo, pro ke vi apartenas a Kristo, vere, me dicas a vi, il recevovos sua salario.

### **Averto pri la sedukto al peko (42-50)**

Qua ma markizas la pokulo, qua kredas pri me, kom pekulo, por lu esus plu bona, ke on pendas muelpetro cirkum lua kolo, e ke on jetas lu aden la maro.

E se tua manuo divenas kauzo por la peko, de-tranchez ol! Esas plu bona por tu, ke tu iras kom kriplo en la vivo, quale se tu iras kun amba manui al inferno, en la eterna fairo.

E se tua pedo divenas kauzo por la peko, de-tranchez ol! Esas plu bona por tu, ke tu iras klaudikanta en la vivo, quale se tu iras kun amba pedi al inferno, en la eterna fairo.

E se tua okulo divenas kauzo por la peko, de-tranchez ol! Esas plu bona por tu, ke tu iras kun un okulo al rejolando di Deo, quale se tu iras kun du okuli al inferno, en la eterna fairo. A singla sakrifiko apartenas salo, ed a vi la sufro-fauro, qua purigas e konservas vi. Salo esas bona afero, ma se la salo perdas olua forteso, quale efikos la salo? Montrez, ke vi posedas la forteso dil salo e konservez paco inter vi!

### **(10) Pri la divorco (1-12)**

Ed Iesu iris al regiono di Judea, tra la lando transe de la Iordan. Ed itere venis la turbo a lu, ed il instruktis li, segun la kustumo. E la farizei venis e questionis lu por tentar lu: Ka la spozulo darfas forsendar sua spozino?

Iesu ma respondis: Quon imperis Mose a vi? Li parolis: Mose permisio skribar divorco-dokumento por forsendar la spozino. Iesu ma respondis: Pro la hardeso di via kordii Mose permisio lo. Ma dum la komenco dil kreado, Deo kreis la homo kom viro e muliero. *Pro to la viro departos patro e matro por ligar su kun la muliero. E la amba esos un karno.* Tale li ne esas du personi, ma un karno. Quon nun Deo kunjuntis, la homo ne separtez lo! E heme lua dicipuli facis la sama questiono pri la temo. Ed Iesu respondis: Qua forsendas sua spozino e prenas altra muliero ruptas la mariajo. E se la spozino forsendas sua spozulo e prenas altra viro, el ruptas la mariajo.

### **Iesu benedikas la infanti (13-16)**

Ed on duktis infanti ad Iesu, ke il tushez li, ma la dicipuli reprimandis la konduto dal homi. Kande Iesu audis to, il iraceskis e parolis a li: Lasez venar la infanti a me e ne impedez li, pro ke li posedas la rejio di Deo. Vere, me dicas a vi: Qua ne aceptas la rejio di Deo kam infanto ne eniros ol! Ed Iesu prenis la infanti sur la brakii e benedikis li per la manui.

### **La richa yunulo (17-27)**

E kande Iesu iris al strado, yunulo hastis a lu, falis koram lua pedi e questionis: Bona maestro, quon me devas facar por recevar la eterna vivo? Iesu ma dicis: Pro quo tu nomas me bona? Nur Deo esas bona. Tu konocas la imperi. Ne adulterez, ne mortigez, ne furtez, ne donez falsa atesto kontre tua proximo, ne raptez, honorizez tua gepatri! Il ma dicis: Maestro, me plenigis ica imperi depos mea infanteso.

Iesu vidis en lua vizajo e sentis amo por lu e dicis: Mankas ankore kelke!

Irez e vendez tua tota posedajo e disdonez ol inter la povri, lore tu havos trezoro en la cielo. Prenez tua kruco e sequez a me! La yunulo ma divenis trista e foriris, pro ke il havis multa domeni. Iesu vidis cirkume e parolis a sua dicipuli: Quale desfacile iros la richuli al rejio di Deo! La dicipuli ma astonesis pri lua vorti. Iesu ma repetis: Yes, esas desfacila afero por richa viro enirar la rejio di Deo. Esas plu facila ke kamelo iras tra agul-truo, quale se la richa viro iras al rejio di Deo. Li ma teroreskis tre ed interparolis: Qua trovos salvo? Iesu ma regardis li e parolis: Che la homi esas to ne posibla, ma che Deo! Pro ke por Deo omno esas posibla.

### **La salario por la sucedo (28-31)**

Nun komencis Petrus e dicis: Videz, ni livis omno e sequis a tu! Iesu ma respondis e parolis: Vere, me dicas a vi: singlu, qua livas pro me e la Evangelio domo, gefrati, gepatri, infanti e posedajo, recevos omno en ica vivo centople, nam domi, gefrati, matri, infanti e posedajo, se anke sub persekuto. E en la futura mondo il havos la eterna vivo.

Ma multi ek la unesma esos lasta, e la lasta esos unesma.

### **La triesma anonco pri la morto e la rezurekto da Iesu (32-34)**

Ili iris ad Ierusalem, ed Iesu iris avane, ed li timis tre e tremis. Iesu prenis sua dicipuli latere e komencis dicar quon eventos kun lu: Audez! Ni iras ad Ierusalem, e la Filiulo dil homo falos en la manui dil chefsacerdoti e skribisti, e li kondamnos lu a la morto e transdonos lu a la pagani. E li mokos pri lu, li flogos, sputos e mortigos lu. E dum la triesma jorno il rezurektos.

### **Pri dominaco e servo (35-45)**

Nun iris Iakobus ed Ioanes, la filiuli di Zebedeus, ad Iesu e parolis: Maestro, ni pregas tu, grantez a ni ica deziro! Ed Iesu dicis: Quon vi deziras? E li dicis: Grantez, ke unu ek ni sidos an tua dextra latero e la altru an tua sinistra latero en tua splendideso!

Iesu ma respondis: Vi ne savas, quon vi pregas! Ka vi povas drinkar ek la kalico, ek qua me drinkos? Ka vi povas recevar la bapto, quan me recevos? E li dicis ad Iesu: Ni povas lo! Iesu ma dicis: Vi povas ya drinkar ek la kalico e vi povas recevar la bapto. Ma me ne povas determinar, ilqua sidos an mea dextra o sinistra latero. Ibe sidos iti, quin Deo determinis.

E kande la altra dicipuli audis to, li iraceskis pri Iakobus ed Ioanes. Ma Iesu vokis li a su e parolis: Vi savas, ke la regnanti opresas lia populi, e ke la granduli misuzas lia potenteso. Inter vi ma to ne eventez! Qua volas esar inter vi granda, il esez via servisto, e qua volas esar inter vi la estro, il esez la servisto da omni. Pro ke anke la Filiulo dil homo ne venis por recevar servi, ma por servar e donar sua vivo kom ransono por multi.

### **Iesu risanigas blindulo (46-52)**

E li venis ad Ieriko. Kande Iesu e sua dicipuli, ensemble kun granda turbo, volis departar la urbo, videz ibe sidis blindulo sur la strado e mendikis. Esis Bartimeus, la filiulo di Timeus. E kande il audis, ke Iesu di Nazaret aparabis, il vokis: Iesu, Filiulo di David, montrez graco a me! La homi ma volis ke il tecez, il ma vokis ankore plu laute: Iesu, Filiulo di David, montrez graco a me! Ed Iesu stacis e lasis vokar lu. E la homi dicis al blindulo: Havez kurajo! Il vokas tu. Il ma forjetis sua mantelo ed iris ad Iesu.

Ed Iesu questionis: Quon me facez? La blindulo respondis: Rabino, me volas vidar! Ed Iesu dicit: Irez. Tua kredo salvus tu! E senfriste la blindulo povis vidar e sequis ad Iesu sur la voyo.

### **(11) La eniro da Iesu ad Ierusalem (1-11)**

Koncize ante Ierusalem, li venis en la proximeso de Betfage e Bethania an la olivo-monto. Iesu nun sendis du dicipuli avane e dicit: Irez al proxima vilajo. Ibe vi trovos yuna asno, ligita, qua portis nultempe homo. Desligez ol e duktez ol adhike. E se irgu questionas, pro quo vi facas to, lore respondez: La Sinioro bezonas ol e retrosendos ol ja balde!

Li iris aden la vilajo, trovis la yuna asno advere ligita an korto-pordego e forduktis ol. E la homi questionis: Quon vi facas? Li ma respondis segun la impero da Iesu, ed on lasis irar li. E li duktis la asno ad Iesu, pozis lia vesti sur la dorso dil animalo, ed Iesu sideskis sur la asno.

Multa homi extensis lia vesti sur la strado, altri detranchis brancheti dil arbori e dissemis oli sur la voyo.

E la homi, avane e dope, vokis: Hosiana! Laudo pri itu, qua venas en la nomo dil Sinioro! Glorio pri la rejio di David, nia patro, qua venas en la nomo dil Sinioro!

Ed Iesu eniris Ierusalem e la templo. Ibe il regardis omno. Kande la vespero venis, Iesu e sua dicipuli iris a Bethania.

### **La senfrukta figiero. La duesma netigo dal templo. La forteso dil kredo (12-26)**

E kande li departis la sequanta dio Bethania, Iesu sentis hungro. Ed il vidis ek la foreso figiero kun folii. Ed il iris al arboro por vidar ka ibe esus frukti. Ma la arboro portis nur folii, pro ke ne esis sezono. Ed Iesu dicit al figiero: Future nulu manjez tua frukti! E lua dicipuli audis la vorti.

E li venis ad Ierusalem. Ed Iesu eniris la templo e forpulsis la komercisti e kompranti. Il renversis la tabli dil kambisti e la stuli dil kolombo-vendisti. Ed il ne permis, ke irgu portis objekto tra la ante-korto dil templo. Il dicit a li: Ka ne esas skribita: *Mea domo esez pregeyo por omna populi?* Vi ma facis ek la templo raptero-groto! E la chefsacerdoti e skribisti audis to e pripensis quale li povus mortigar lu. Pro ke li timis Iesu, nam la populo astonis pri ilua doktrino. E kande la vespero venis, Iesu departis la urbo.

E kande li venis la sequanta matino al figiero, li vidis ke la figiero sikeskis til la radiki. E Petrus memoris e dicit ad Iesu: Rabino, videz, la figiero, quan tu maledikis, sikeskis!

Ed Iesu respondis: Kredez pri Deo! Vere, me dicas a vi: Se irgu dicas ad ica monto: Levez tu ed jetez tu aden la maro! sen dubito en kordio, lore lo eventos quon anke sempre il dicas.

Pro to me dicas a vi: Omno quon vi deziras dum la prego, kredez ke vi recevos lo! E vi obtenos lo! E se vi pregas, lore pardonez, se vi havas debanto, tale ke anke via Patro en la cielo povas pardonar via peki. Se vi ma ne pardonas, lore via Patro en la cielo ne pardonos via peki.

### **La questiono pri la plenipotenco da Iesu (27-33)**

E li venis itere ad Ierusalem. E kande Iesu iris en la templo cirkume, la chefsacerdoti, skribisti ed estri venis a lu e parolis: En quala plenipotenco tu agas, e qua donis a tu ica plenipotenco? Iesu ma respondis: Anke me havas questiono a vi. Se vi respondos, me dicos a vi qua donis a me la plenipotenco. En quala komiso baptis Ioanes? Ka la komiso esis Deala o homala? Respondez! E li interdebatis e dicit: Se ni dicas ek la cielo, il dicos, pro quo vi lore ne kredis pri Ioanes? Se ni ma dicas dal homo, quo lore? Pro ke li timis la populo, qua kredis ke Ioanes esis vera profeto.

E li respondis ad Iesu: Ni ne savas lo! Ed Iesu parolis a li: Lore me ne dicis, qua donis a me la plenipotenco!

### **(12) La parabolo pri la vit-gardenisto (1-12)**

Ed Iesu komencis parolar per paraboli: Homo plantacis vit-kolino, protektis la kolino per fenco, erektis presilo, konstruktis guato-turmo, transdonis sua posedajo al vit-gardenisti e voyajis exterlande.

Ed il sendis en certena intervali servisto al vit-gardenisto por recevar sua profito ek la rekolto. Ma la farmisti sizis la servisto, batis lu, e forsendis lu kun vakua manui. Ed itere il sendis servisto. Ma li stonagis e deshonorizis lu e retrosendis lu. E la triesma serviston li mortigis, e sempre eventis lo samo.

Nun il sendis sua amata ed unika filiulo a li, pro ke il pensis, li respektos lu! Ma la farmisti interparolis: Il esas la heredanto! Venez, ni volas mortigar lu, lore apartenos la posedajo a ni!

E li sizis e mortigis lu e jetis la kadavro ek la vit-kolino.

Quon facos nun la siorulo dil vit-kolino? Il venos e mortigos la farmisti, e transdonos la vit-kolino ad altra viro! Ka vi ne lektis la vorto en la skriburo: *La stono, quan la masonisti forjetis, divenis la angulo-petro. La Siniore agis tale, e ni vidis ica miraklo?*

Nun li volis sizar lu, ma li timis la populo, pro ke li komprenis, ke la parabolo esis kontre li. E li facis nulo e foriris.

### **La questiono pri la imposto (13-17)**

E li sendis la farizei e la partisans di Herodes a lu por erektar kaptilo. Ili dicis ad Iesu: Maestro, ni savas, ke tu esas sincera e libera, pro ke tu ne taxas la homala rango, ma la Deala vereso. Dicez, ka la imperiestro obtenez la imposto o ne?

Pro ke Iesu ma konacis lia hipokriteso, il dicis: Pro quo vi tentas me? Donez a me denaro! Li donis ad Iesu la moneto. Ed il parolis a li: Quala imajo e nomo esas hike? Li ma respondis: De la imperiestro! Ed Iesu parolis a li: Donez al imperiestro, quon apartenas al imperiestro, ed a Deo, quon apartenas a Deo!

### **La questiono pri la rezurekto (18-27)**

E venis kelka saducei ad Iesu, qui ne kredis pri la rezurekto, e questionis: Maestro, Mose donis a ni sequanta precepto: Se spozulo mortas sen infanti, lore devas mariajar la fratulo dil spozulo la vidvino e genitar infanti por la mortinta spozulo.

Olim esis sep fratuli. La unesma fratulo prenis muliero e mortis sen infanti. La duesma fratulo prenis la muliero, mortis sen infanti e che la triesma fratulo esis lo samo. Omni sep fratuli prenis la muliero e mortis sen infanti. Tandem mortis anke la muliero. Se nun venas la dio dil rezurekto, a qua viro apartenos la muliero? Nam omna sep esis la spozuli dil muliero.

Iesu respondis e parolis: Vi traktas la afero tote falsa, pro ke vi ne konocas la santa skriburo nek la potenteso di Deo. Se la mortinti rezurektos, lore li ne mariajos, ma li vivos kam la anjeli en la cielo. Generale pri la rezurekto dal mortinti: Ka vi nultempe lektis en la libro Mose la evento pri la brulanta dornoza arbusto, ube Deo dicas a Mose: *Me esas la Deo di Abraham, Isaak ed Jakob?* Il ne esas la Deo dil mortinti, ma dil vivanta. Vi do eroras tre.

### **La questiono al maxim granda impero (28-34)**

Nun venis skribisto, qui audabis la debato e la bona respondo da Iesu, ed il questionis Iesu: Qua esas la maxim granda impero ek omni?

Iesu ma respondis: La maxim granda impero esas: *Audez, o Israel, la Sinioro, nia Deo, esas la unika Sinioro. Tu devas amar la Sinioro, tua Deo, per tua tota kordio, tua tota anmo, tua pensi e tua forteso!* To esas la unesma impero. E la duesma esas kam la unesma: *Amez tua proximo kam tu ipsa.* Ne existas plu granda impero. E la skribisto dicis: Yes, maestro, esas quale tu dicas. Existas nur un Deo. Ed on devas amar lu per tota kordio, raciono, anmo e forteso, ed on devas amar sua proximo kam su ipsa. To esas plu granda kam omna animalo-sakrifiki e doni. E kande Iesu vidis, ke il esis inteligenta, il dicis: Tu ne esas for dil rejio di Deo! E nulu riskis facar altra questiono.

### **Ka Kristo esas la filiulo di David? Avertu pri la skribisti (35-40)**

Ed Iesu instruktis en la templo e parolis: Quale la skribisti povas dicar, ke Kristo esas la filiulo di David? David ipsa dicas per la Santa Spirito: *La Sinioro parolis a mea sinioro: Sidez an mea dextra latero! Me vinkos tua enemiki, e li esos la skabelo sub tua pedi!* David ipsa dicas do Sinioro – quale do il povas esar lua filiulo?

La turbo audis la vorti da Iesu volunte. Ed Iesu dicis a li: Gardez vi de la skribisti. Li iras en longa robo e lasar salutar su en la bazari. Li okupas la maxim bona sido-plasi en la sinagogo e dum la repasti, li manjas la richeso dil vidvini e parolas longa pregi segun la semblo. Il recevos harda judiko.

### **La obolo dil vidvino (41-44)**

Ed Iesu sidis kontre la almon-kesto ed observis quale la homi venis por donacar. E la richi donacis multe.

E venis povra vidvino, qua donacis du oboli. Nun il vokis sua dicipuli a su e dicis: Vere, me dicas a vi: Ica povra vidvino donacis plu kam omna altri en la almon-kesto. Nam omni donacis ek lia superfluo, elu ma donacis omno, quon on bezonas por vivar.

### **(13) Pri la fino dil mondo (1-4)**

E kande Iesu venis ek la templo, dicipulo dicis a lu: Maestro videz, quala stoni e quala domego! Ed Iesu respondis e parolis: Ka tu admiras ica domego? Hike ne restos stono sur la altra. Omno disfalos til la fundo!

Ed Iesu iris sur la olivo-monto e sideskis kontre la templo. Petrus, Iakobus, Ioanes ed Andreas venis sen la altri e questionis: Dicez a ni, kande eventos to omno, e quala signo venos en la fin-tempo?

### **La mizero dum la fin-tempo (5-13)**

Iesu ma komencis parolar: Gardez vi, ke nulu tentas vi! Nam venos multa homi sub mea nomo e dicos: Me esas lo! E li tentos multi. Se vi ma audos pri milito e fanfari, ne timez, nam tale devas eventar, ma lo ne esos la fino. Populo kombatos kontre la altra popolo, e rejolando kontre la altra, e hike ed ibe eventos tertremi, hungro-mizeri e tumulto. To esas la komenco dil parturdolori.

Vi ma, konservez vi! Pro ke ili transdonos vi al tribunali. Ili batos vi en la sinagogi! Ili duktos vi koram reji e princi pro me kom atesto. Ed ad omna pagani on devas anunciar antee la Evangelio.

E se li forduktos vi, tale ne sorgez e pensez quon vi parolos, pro ke quon vi recevos en ica horo, ton parolez! Pro ke ne vi parolos, ma la Santa Spirito.

La fratulo transdonos la altra fratulo al exekutisto, e la patro la infanto, e la infanti levos su kontre la gepatri por mortigar li. Ed on odios vi pro mea nomo. Qua ma perseveras til la fino, trovos salvo.

### **La granda ditreso (14-23)**

Esas skribita, ke `la hororinda monstro' stacos ube ol ne darfas stacar. Qua lektas ica vorti, pripensez quon oli signifikas. Se vi vidas to, omna habitanti di Judea devas fugar al monti. Qua esas jus sur la tekto, ne perde tempo por prenar ankore irgo ek la domo. Qua esas jus sur la agro, ne irez adheme por prenar sua mantelo. Desfacila destinon havos la mulieri, qui expektas infanto o qui alaktas infanto. Pregez a Deo, ke ica tempo ne falos en la vintro. Nam quon eventos en ica jorni, esos plu hororinda kam omno altra depos la jorni dil kreado e dum la futuro. Se la Siniore ne kurtigus ica teroriva tempo, nula homo trovus salvo. Ma il kurtigis ica tempo por lua elektiti.

Se lore irgu dicas a vi: Videz, hike esas Kristo! Od: Ibe esas Kristo! - ne kredez ad ica persono! Pro ke aparos multa falsa Kristi e profeti. Ili pruvos su per mirakli por trompar mem, se posibla, la elektiti di Deo. Pro to gardez vi! Me predicis a vi omno.

### **La mondo-tribunalo venos (24-31)**

Ma en ica jorni, pos ica ditreso, la suno obskureskos, la luno esos sen brilo, la steli falos ek la cielo e la ordino en la cielo disfalos. Ed on vidos la Filiulo dil homo, quale il venas en la nubi kun granda forteso e splendideso. Lore il eksendos sua anjeli e kolektos sua elektiti de la quar venti, de la maxim extrema fino dil tero til la maxim extrema fino dil cielo.

De la figiero ma lernez la parabolo. Se olua brancheto esas sukoza e la folii kreskos, vi perceptos ke la somero venos. Do, se vi vidas, ke ica eventi venos, lore percepetez ke la fino venos nemediate. Vere, me dicas a vi: Ica generaciono ne pasos til ica kozi eventos. Cielo e tero pasos, ma mea vorti ne pasos.

### **Exhorto pri vigileso (32-37)**

Pri la dio e la horo nulu savas, anke ne la anjeli en la cielo, anke ne la Filiulo, ma nur la Patro. Atencez, vigilez e pregez! Pro ke vi ne savas kande la tempo venos. Esas quale che homo, qua voyajis exterlande. Il departis sua domo e sua servisti recevis plenipotenci, e singlu certena tasko, quale exemple la pordisto. Do vigilez. Nam vi ne savas, kande la domestro venos, vespere, noktomezale o matine dum la hano-kanto, pro ke se la domestro venos subite, il ne trovez vi dormante. Quon me ma dicas a vi, ton me dicas ad omni: Vigilez!

### **(14) La sufro e la morto da Iesu Kristo. La intenco dal chefsacerdoti e skribisti (1-2)**

Esis ma du jorni pos la Pasko-festo e la festo dil azima pani. E la chefsacerdoti e skribisti volis sizar lu sekrete por mortigar lu. Ma li dicis: Ne dum la festo. Ne darfas eventar tumulto inter la populo!

### **Muliero honorizas Iesu (3-9)**

Iesu esis en Bethania che Simon, la lepriko. Dum la repasto aparis muliero. Elu havis poka boteleto kun pura, valoroza nardo-oleo. El apertis la boteleto e varsis la oleo super la kapo di Iesu.

Kelki ma indignis interne e parolis: Pro quo eventis ica disipo de la oleo? Por ica oleo on obtenus plu kam triacent denari e povus disdonar la pekunio al povri! E li grunis pri el. Iesu ma parolis: Lasez el! Pro quo vi insultas pri el? El facis bona verko por me. Nam la povri esos sempre che vi, e vi povas plenigar bona agi por li kande sempre vi volas, ma me ne esos omnatempe che vi. El facis quon el povis. El uncionis mea korpo ja ante mea enterigo. Vere, me dicas a vi: Ube anke sempre on anuncos ica Evangelio en la mondo, on parolos anke pri ica evento kom memoro pri ica muliero.

### **La trahizo da Iudas (10-11)**

Iudas Iskariot, unu ek la dicipuli, iris al chefsacerdoti por trahizar Iesu. Li ma joyis, kande li audis to e promisis ad Iudas pekunio. Ed Iudas serchis a bona momento por trahizar lu.

### **La lasta Pasko-repasto (12-21)**

E dum la unesma dio dil azima pani, kande on buchis la Pasko-agnelo, sua dicipuli parolis ad Iesu: Adube ni devas iarar por prepar la Pasko-repasto, tale ke tu povas manjar ol? Ed il determinis du dicipuli e dicis: Irez aden la urbo! Ibe vi vidos viro kun aquo-krugo. Sequez a lu! E se il eniras domo, parolez al domestro: La maestro lasas questionar ube esas la chambro por la Pasko-repasto por me e mea dicipuli? Ed il montros a vi granda chambro en la supra etajo kun divani. Ibe preparez la repasto. E la dicipuli eniris la urbo, ed omno eventis segun la vorti da Iesu. E li preparis la repasto.

E kande la vespero venis, Iesu aparis kun sua dicipuli ibe. E kande li sidis che tablo e manjis, Iesu dicis:

Vere, me dicas a vi, unu ek vi, qua manjas kun me, trahizos me. E la dicipuli divenis trista e questionis Iesu: Ma ne me? E la sequanta: Ma ne me? Il ma respondis: Unu ek vi, qua kun me trempas la pano en la sauco! La Filiulo dil homo iros adibe segun la skriburo, ma ve pri la viro, qua trahizos la Filiulo dil homo! Por icu esus plu bona se il ne esus naskita!

### **La instalo dal Eukaristio (22-25)**

E dum li manjis, Iesu prenis la pano, benedikis e ruptis ol, disdonis ol e parolis: Prenez e manjez! To esas mea korpo. Ed il prenis la kalico, dankis, transdonis ol al altri, ed omni drinkis ek la kalico. Ed Iesu dicis a li: To esas mea sango, la sango dil nova alianco. Ica sango esos varsata por multi. Vere, me dicas a vi: Me ne drinkos vino til la dio, ube me drinkos vino en la rejio di Deo.

### **La predico pri la renego da Petrus (26-31)**

E pos la laudo-kanto, li iris al olivo-monto. Ed Iesu dicis: En ica nokto vi skandaleskos pri me, nam esas skribita: *Me batos la pastoro, e la mutoni diskuros*. Ma pos mea rezurekto me iros avane a Galilea. Petrus ma dicis: Me ne dubitos pri tu! Ma Iesu parolis: Vere, me dicas a tu: hodie en ica nokto, ante ke la hano kantos dufoye, tu renegos me trifoye! Il ma dicis tamen: Anke se me devus mortar kun tu, me ne renegos tu! Lo samo dicis anke la altri.

### **Getsemane (32-42)**

E li venis ad izolita loko kun la nomo Getsemane. Ed Iesu dicis a sua dicipuli: Repozez hike, til mea prego fineskis. Ed il kunprenis Petrus, Iakobus ed Ioanes. Ed il sentis granda hororo.

Ed Iesu dicis a li: Mea anno dezoleskas til la morto. Restez hike e gardez! Ed il iris kelke avane, genupozis e pregis, ke se esus posibla, ica horo preterirez. Ed il parolis: Abba, Patro! Por tu esas omno posibla. Forprenez ica kalico de me! Ma ne quale me volas, ma quale tu volas! Ed il iris a li e trovis li dormante. Ed il parolis a Petrus: Simon, ka tu dormas? Ka tu ne povis nur un horo gardar? Gardez e pregez, tale ke vi ne falas en tento! La mento esas pronta, ma la karno esas febla.

Ed il iris itere al loko e pregis per la sama vorti. E kande il retrovenis, li dormis itere, pro ke lia okuli divenabis peza. E li ne savis, quale li povis responder ad Iesu.

Ed il venis lo triesma foyo a li e dicis: Ka vi ankore sempre dormas e repozas? Sat! La horo venis. Videz, la Filiulo dil homo falos en la manui dil pekeri. Ni volas levar ni ed irar! Videz, il, qua trahizos me, venas.

### **La aresto da Iesu (43-52)**

E kande Iesu ankore parolis, aparis Iudas e kun lu granda grupo kun espadi e bastoni, qui esis sendita dal chefsacerdoti, skribisti ed estri. Iudas ma informabis li pri signo: Il, qua obtenos da me kiso, esas Iesu. Forduktez lu sub granda prudenteso!

Ed Iudas iris quik ad Iesu, dicis: Rabino, rabino! e kisis lu. Li ma sizis ed arestis Iesu. Viro ek la turbo levis la espado, batis la servisto dil chefsacerdoto, e detranchis ilua orelo.

Ed Iesu dicis a li: Vi venis kam rapteri kun espadi e bastoni por arestar me. Singladie me esis en la templo ed instruktis, ma vi ne sizis me. To eventis segun la santa skriburo. Ed ilua dicipuli departis lu e fugis. Yuna viro kun facila mantelo sequis ad Iesu. E li volis arestar anke lu. Ma il fugis sen sua mantelo e forkuris nuda.

### **Iesu koram la Alta Konsilistaro (53-65)**

E li duktis Iesu al chefsacerdoto, ed omna sacerdoti, estri e skribisti kunvenis. E Petrus iris til la ante-korto dil chefsacerdoto, sideskis che la servisti e varmigis lua manui super la fairo.

La Alta Konsilistaro serchis nun atesto kontre Iesu por mortigar lu, ma li trovis nule. Pro ke multi parolis falsa atesto kontre Iesu, ma la deklari ne esis konforma. E kelki levis su e parolis falsa atesto kontre Iesu e dicis: Ni audis ilua vorti: Me destruktos ica da homi facita templo ed erektos en tri jorni altra templo, qua ne esis facita da homi. Ma anke lia deklari ne esis konforma. E la chefsacerdoto iris en la mezo e questionis Iesu: Ka tu ne volas responder kontre la atesti da ica viri?

Iesu ma tacis e repondis nulo. Ed itere la chefsacerdoto questionis: Ka tu esas Kristo, la Filiulo dil Eternulo? Iesu ma dicis: Me esas itu. E vi vidos la Filiulo dil homo dextre de la Eternulo e se il venas kun la cielala nubi!

Nun la chefsacerdoto laceris sua robo e dicis: Pro quo ankore altra testi? Vi audis la blasfemo. Quon vi opinionas?

Ed omni dicis, ke il meritis la morto.

E kelki ek li komencis sputar aden la vizajo di Iesu e batis lu per pugni e vokis: Qua batis tu? Ka tu ne esas profeto?

Nun venis la soldati e batis Iesu pluse.

### **La renego da Petrus (66-72)**

E dum Petrus esis ankore en la korto, servistino dil chefsacerdoto venis. E kande el vidis Petrus, qua varmigis sua manui, el dicis: Anke tu esabis che Iesu di Nazaret. Il ma renegis e dicis: Me ne savas quon tu dicas. Ed il departis la ante-korto e la hano kantis. Ma la servistino dicis al altri: Il esis dicipulo di lu. Ma Petrus renegis itere.

E pos kelka tempo la altri dicis a Petrus: Vere, tu esas dicipulo di Iesu. Tua dialekto esas ek Galilea. Petrus ma vokis: Deo punizez me se me mentias! Me ne konocas ica viro!  
Nun kantis la hano itere, e Petrus memoris pri la vorti da Iesu: Ante ke la hano kantos dufoye, tu renegos me trifoye. E Petrus komencis plorar.

### **(15) Iesu koram Pilatus (1-5)**

E dum la frua matino, la chefsacerdoti, estri e skribisti facis kun la tota konsilistaro rezolvo e duktis Iesu, ligita, koram Pilatus.  
E Pilatus questionis Iesu: Ka tu esas la rejo dil Judi? Iesu ma respondis: Tu dicas lo! E la chefsacerdoti adportis multa plendi kontre Iesu. Pilatus ma questionis e parolis: Ka tu ne respondas? Videz, quanta akuzin li facas!  
Iesu ma tacis, e Pilatus astonis tre.

### **La kondamno a la morto (6-15)**

Ma okazione la Pasko-festo, Pilatus grantis al Judi amnestio a un kaptito, segun lia volo. Esis ma certena Barabas kun altra revolteri, qui trovesis en karcero pro asasino. Kande nun la turbo iris koram Pilatus por postular la ordinara indulgo, Pilatus questionis: Ka vi volas la rejo dil Judi? Pro ke il savis tre bone, ke la religioza duktanti volis kondamnar Iesu nur pro envidio.  
Ma la chefsacerdoti stimulis la homi, ke Pilatus grantez a Barabas la libereso. Pilatus ma questionis: Quon me facez kun itu, quan vi nomizas la rejo dil Judi?  
Li ma kriis: Krucagez lu!  
E Pilatus parolis: Ma quala kriminon il facis? Li ma kriis pluse: Krucagez lu! E Pilatus grantis la libereso a Barabas pro la turbo, lasis flogar Iesu e transdonis lu al kruco-morto.

### **Mokego e dorn-krono (16-20)**

E la soldati duktis Iesu al pretoreyo, kunvokis la turbo, pozis purpur-mantelo cirkum Iesu, facis dorn-krono e kronizis lu. E li vokis: Ni salutas tu, rejo dil Judi! E li batis per bastono sur ilua kapo, sputis ad Iesu e genupozis koram lu. E pos ke li mokabis pri Iesu, li forprenis la purpur-mantelo e pozis ilua propra vesti a lu. E li duktis lu extere por krucagar lu.

### **La krucago da Iesu (21-32)**

Survoye li renkontris viro, qua venis jus de la agro, e li koaktis lu portar la kruco. Il esis Simon ek Kirene, la patro da Alexander e Rufus. E li duktis lu al loko Golgata, to esas Kalvario. E li donis a lu miro-vino, ma il ne drinkis.

Pos la krucago, li dividis ilua vesti inter su e kubludis pro la parti. La krucago ma eventis dum la triesma horo. E super Iesu esis la enskriburo: Rejo dil Judi.

E kun Iesu li krucagis du rapteri, dextra e sinistra de Iesu, segun la skriburo: *E li kontis ilu inter la senleguli.*

E la homi, qui preteriris, mokis e sukusis la kapi e parolis: Tu esas do itu, qua volas destruktar la templo ed erektar ol dum tri jorni! Salvez tu ipsa e departez la kruco! E la chefsacerdoti e skribisti mokis same: Altri il salvis, ma ne su ipsa! Kristo, tu rejo di Israel, departez la kruco, tale ke ni vidos e kredez! Ed anke la amba rapteri mokis pri Iesu.

### **La morto da Iesu (33-41)**

Kande ma venis la sisesma horo tenebro eventis super la tota lando til la nonesma horo. E cirkum la nonesma horo Iesu vokis laute *Eloi, eloi, lama sabachtani!* To esas: Mea Deo, pro quo tu livis me!

E multi, qui stacis cirkume, dicis: Audez, il vokas ad Elia! Esis ma viro, qua sizis stango kun vinagro-sponjo, quan il duktis ad Iesu e parolis: Halto! Ni volas vidar, kad Elia venos por salvar lu!

Iesu ma kriis laute e mortis. E la kurteno en templo laceris de supre adinfre.

Kande ma la kapitano vidis, ke Iesu kriis e mortis, il dicis: Vere, ica viro esis la Filiulo di Deo!

Esis anke kelka mulieri che la krucago, inter eli Maria ek Magdala e Maria, la matro dil juniora Iakobus, Ioses e Salome. Elu esabis che Iesu en Galilea ube el sorgis por lu. Esis ankore multa altra mulieri ibe, qui venabis kun Iesu ad Ierusalem.

### **La entombigo da Iesu (42-47)**

E kande la vespero venis, esis la dio ante la sabato, Iosef di Arimatea, nobla konsilisto, qua expektis ipsa anke la Deala rejio, riskis irar a Pilatus e pregis al korpo di Iesu. Pilatus ma astonesis, ke Iesu esus ja mortinta, ed il vokis a kapitano e questionis pri la tempo kande Iesu mortis. E pos ke la kapitano informabis Pilatus, Iosef di Arimatea recevis la korpo. Iosef kompris linjo e prenis la korpo de la kruco, envelopis ol en linji e pozis ol en tombo ek roki. Lore il klozis la eniro per granda stono. Maria Magdalena e Maria, la matro di Ioses, vidis ica evento.

### **(16) La rezurekto da Iesu Kristo (1-8)**

Pos ke la sabato pasabis, Maria Magdalena, e Maria, la matro di Iakobus e Salome, kompris bonodoranta kondimenti por uncionar la korpo di Iesu. E ja frue, dum la unesma dio dal semano, kande la suno aparis, eli iris al tombo. Ed eli questionis inter su: Qua rulos la stono de la tombo?

E kande eli regardis adsupre, eli vidis, ke la granda stono mankis. Ed eli iris aden la tombo. Ibe sidis yunulo, vestizita en longa blanka robo, ed eli pavoreskis. Il ma parolis ad eli: Ne timez! Vi serchas Iesu di Nazaret, qua mortis sur la kruco. Il ne esas hike. Deo vekigis lu ek la morto! Ibe, videz ube il jacis! Ma nun irez e dicez al dicipuli ed ante omno a Petrus, ke il iros avane a Galilea. Ibe vi vidos Iesu, tale quale il lo dicis. Ed eli iris rapide ek la groto e fugis ek la tombo. Eli tremis ed esis plena de pavoro. Ed eli parolis kun nulu pri ica evento ek pavoro.

### **Iesu aparas koram sua dicipuli (9-14)**

Pos la rezurekto da Iesu, dum la unesma dio dil semano, Iesu aparis unesme koram Maria Magdalena, quan il olim liberigabis de sep demoni. Maria Magdalena iris nun al dicipuli, qui ploris e lamentis, e raportis pri elua experienco. E kande la dicipuli audis, ke Iesu vivis e ke Maria vidabis lu, li ne kredis.

Pose, Iesu montris su koram du dicipuli en altra figuro, qui iris al lando. E la amba dicipuli iris al altri ed anuncis, quo eventis. Ma anke cafoye li ne kredis.

Tandem Iesu aparis koram omna dicipuli che tablo e reprimandis lia nekredo e lia harda kordii, pro ke li ne kredis ad iti, qui povis atestar ilua rezurekto.

### **La komiso pri la anonco dal Evangelio e la acenso da Iesu Kristo vers la cielo (15-20)**

Ed Iesu dicis a li: Irez nun al tota mondo ed anunciez la Evangelio! Qua kredas e recevos la bapto trovos salvo, qua ma ne kredos trovos kondamno. La kredanti ma havos sequanta signi: Ili forpulsos demoni en mea nomo e li parolos nova lingui.

Li tushos serpenti e levos oli, e se li drinkos veneno, li ne havos noco. Li pozos lia manui sur maladi, e la maladi trovos risanigo. Pos ke la Sinioro nun parolabis tale kun sua dicipuli, la cielo aceptis lu, ed Iesu sideskis an la dextra latero di Deo. Li ma iris al tota mondo ed anuncis omnaloke la Evangelio. E la Sinioro efikis inter li e fortigis la vorto per la mirakli, quin li exekutis. Amen.